

Minister Oduber na ocasion di conmemoracion di 50 aña di fayecimento di Juancho Yrausquin

Ban recorda e dia aki pa pone un stenchi di unda nos kier sigui hiba Aruba pa e proximo 50 pa 100 añanan



ORANJESTAD (AAN): Minister Otmar Oduber den number di Gobierno di Aruba tabata presente diaranson atardi na estatua di Juan Enrique Yrausquin, caminda a conmemora su 50 aña di fayecimento.

Den un discurso elocuente, e mandatario a mostra cu Juancho Yrausquin tabata un di e pioneronan importante di Pais Aruba, pero tambe un visionario sumamente grandi.

“Un di e cosnan mas importante ora bo corda riba un personahe asina grandi manera Sr. Yrausquin ta e hecho cu

unda cu bo lesa riba dje, y te dia di awe ora papia di ki skina politico, di ki color politico cu bo por ta bin, ora ta identifica Sr. Yrausquin bo ta identifike como un persona humilde, amigo di tur hende independiente di ki barío bo ta, y su vision a reflehá esaki tambe. Mi ta kere mester ta un les cu ora awe nos ta papia di si un barío a haya algo y si e otro barío no a haya un cos, Sr. Yrausquin tabata un di e politiconan cu un vision grandi a bisa cu cada barío akinan na Aruba tin derecho di un school, cada hende cu ta traha y ta biba na Aruba tin derecho riba un

pension, cada persona cu ta den un necesidad tin e importancia di por haya un understand of bijstand”, Minister Otmar Oduber a bisa.

El a agrega cu Sr. Yrausquin ta den historia hunto cu otro gran politiconan no solamente cu e tabata pionero di habri un hotel na Aruba na aña 59, pero tambe pa laga un vision enorme atras. “Despues cu el a bay nos a biba su pensamento, nos a construi ariba su pensamento y awe nos ta biba ariba e pensamento cu e tabatin...un Aruba cu ta depende awe di 70% di turismo pa loke ta trata su economia”.

Minister Oduber ta di opinion cu awe mester para keto y reconoce un vision cu nos tur ta para awe como comunidad di Aruba y cu ta trece riba mesa di 90% di nos famianan e pan di cada dia. E ocasion aki ta e momento husto, despues cu algun aña atras nos a celebra 50 aña di nos turismo, pa recorda con nos a pasa di apenas algun camber pa mas di 10 mil camber. E ta e momento adecua pa basa nos mes riba e base profundo cu a word laga atras, caminda no mester wak di ki region ofdistrito un persona ta bin,

pero prepara pa ora nos no tey mas, por laga atras un vision, un pensamento cu esnan cu ta sigui nos por biba riba dje y cu nos futuro generacionnan por tin un futuro tambe riba djele.

“Un persona cu definitivamente a contribui na djele ta Juan Enrique Yrausquin, conoci den pueblo como Juancho Yrausquin, e sirbitor di pueblo. Den number di Gobierno di Aruba mi ta expresa palabranan pa tur esnan cu ta rond di su pensamento y ta cana den



pasonan di su vision awe, cu nos por celebra e dia aki, recorda e dia aki, pa pone e stenchi di unda nos kier sigui hiba Aruba pa e proximo 50 -100 añanan”, Minister Otmar Oduber a finaliza.